

僧還繼供養。於時多眾住在其寺。勤精專修。具諸道者。時彼道人作僧自在。時有羅漢道人。次知日直。掃除草土。積在中庭。不時除棄。於時比丘惡心呵叱。今此比丘如奴無異。雖知掃地不能除棄。阿難當知。彼時比丘大自在者。今富那奇比丘是也。由其惡心呵得道人。比之為奴。由此一言。五百世中恒為奴身。復由興立勸合眾人供養眾僧。償罪已畢。復遭我世。蒙得過度。今此國中受化之人。皆是往昔勸助之眾。緣是果報。皆得度脫。阿難之等。及與眾會。聞佛所說。歡喜奉行。

三五、尼提度緣品

如是我聞。一時佛在舍衛國祇樹給孤獨園。爾時舍衛城中人民眾多。居止隘迮。廁溷鮮少。大小便利多往出城。或有豪尊不能去者。便利在器中。雇人除之。時有一人。名曰尼提。極貧至賤。無所趣向。仰客作除糞。得價自濟。爾時世尊即知其應度。獨將阿難入於城內。欲拔濟之。到一里頭。正值尼提持一瓦器。盛滿不淨。欲往棄之。遙見世尊。極懷鄙愧。

退從異道。隱屏欲去。垂當出里。復見世尊。倍用鄙恥。迴趣餘道。復欲避去。心意匆忙。以瓶打壁。瓶即破壞。屎尿澆身。深生慚愧。不忍見佛。是時世尊就到其所。語尼提言。欲出家不。尼提答言。如來尊重。金輪王種。翼從弟子。悉是貴人。我下賤弊惡之極。云何同彼。而得出家。世尊告曰。我法清妙。猶如淨水。悉能洗除一切垢穢。亦如大火能燒諸物。大小好惡。皆能焚之。我法亦爾。弘廣無邊。貧富貴賤。男之與女。有能修者。皆盡諸欲。是時尼提聞佛所說。信心即生。欲得出家。佛使阿難將出城外。大河水邊。洗浴其身。已得淨潔。將詣祇洹。為說經法。苦切之理。生死可畏。涅槃永安。霍然意解。獲初果證。合掌向佛。求作沙門。佛即告曰。善來比丘。鬚髮自落。法衣在身。佛重解說四諦要法。諸漏得盡。成阿羅漢。三明六通。皆悉具足。爾時國人聞尼提出家。咸懷怨心。而作是言。云何世尊。聽此賤人出家學道。我等如何為其禮拜。設作供養。請佛及僧。斯人若來。汚我床席。展轉相語。乃聞於王。王聞亦怨恨。情用反側。即乘羽葆之車。與諸侍從。往詣祇洹。欲問如來所疑之事。既到門前。且小停息。祇洹門外。有一大石。尼提比丘坐於石岩。縫補故衣。有七百天人。各持華香。而供養之。

右遶敬禮時王睹見深用歡喜到比丘所而語之言我欲見佛願為通白比丘即時身沒石中踊出於內白世尊曰波斯匿王今者在外欲得來入觀省諮問佛告尼提從汝本道往語令前尼提尋時還從石出如似出水無有罣礙即語王言白佛已竟王可進前王作此念向所疑事且當置之先當請問此比丘者有何福行神力乃爾王入見佛稽首佛足右遶三匝卻坐一面白世尊言向者比丘神力難及入石如水出石無孔姓字何等願見告示世尊告曰是王國中極賤之人我已化度得阿羅漢大王故來欲問斯義王聞佛語慢心即除欣悅無量因告王曰凡人處世尊卑貴賤貧富苦樂皆由宿行而致斯果仁慈謙順敬長愛小則為貴人凶惡強梁憍恣自大則為賤人波斯匿王白世尊言大聖出世多所潤濟如此凡陋下賤之人拔其苦毒使常安樂此尼提者有何因緣生於賤處復種何德得遇聖尊稟受仙化尋成應真唯願世尊敷演分別佛告王曰諦聽善持吾當解說令汝開悟乃往過去迦葉如來出現世間滅度之後有比丘僧凡十萬人中有一沙門作僧自在身有疾患服藥自下憍傲恃勢不出便利以金銀澡槃就中盛尿令一弟子擔往

棄之。然其弟子是須陀洹。由在彼世不能謙順。自恃多財。秉捉僧事。暫有微患。懶不自起。驅役聖人。令除糞穢。以是因緣。流浪生死。恒為下賤。五百世中。為人除糞。乃至於今。由其出家持戒功德。今值我世。聞法得道。佛告大王。欲知爾時僧自在者。今尼提比丘。是波斯匿王白世尊言。如來出世。實為奇特。利益無量。苦惱眾生。佛告大王。善哉。善哉。如汝所言。佛又告曰。三界輪轉。無有定品。積善仁和。生於豪尊。習惡放恣。便生卑賤。王大歡喜。無有慢心。即起長跪。執尼提足。而為作禮。懺悔自謝。願除罪咎。世尊爾時。因為廣說法微妙之義。所謂論者。施論戒論。生天之論。欲不淨想。出要為樂。爾時大會。聞佛所說。各獲道證。信受奉行。